

Piān-tong--nih ê Thâu-m̄ng



“ Eng-lâm
khòaⁿ tiān-sī chiat-
bók pò-chhut ê sió-
kò-sū liáu-āu kā i
siá chò Kàu-hōe Lô-
má-jī bûn-chiuⁿ.”

Tī hit-ê nī-tāi--nih, kan-ta sàh-hiong ē-tit-thang hêng-iông. Chin-chōe tông-hák siūⁿ beh chah chit-ê khah òe khòaⁿ-kháu-tit (?) ê piān-tong khi hák-hāu thak-chu, tui in lâi kóng, che sī chit-kiāⁿ chin khùn-lân ê tāi-chì, chē tī góa keh-piah hit-ūi tông-hák chiū sī chit khoán ê keng-gū.

I-ê piān-tong lâi-bīn ê chhài-sek éng-óan sī ơ-ơ ê tâu-pô, hóan-tng khòaⁿ góa-ê piān-tong lâi-bīn siông-siông ū há-muh (火腿) kap nng-pau (荷包蛋), góan nng-lâng ê piān-tong chin-chiàⁿ sī chha thiⁿ kap tōe. Koh-chài ták-pái chiáh-png ê sī, chit-ê tông-hák lóng òe tī piān-tong lâi-bīn ngheh-tiòh thâu-m̄ng, chóng-sī i iáh lóng bô tì-ì, kā thâu-m̄ng keng--chhut--lâi liáu-āu kè-siok chōan-sim chiáh i ê piān-tong, m̄-kú i án-ni ê chò-hoat sòa hō góa kám-kak kui-ê lêng kiông-beh cho--khí--lâi. “Lí khòaⁿ in lâu-bú ū lōa lâ-sâm chiū hó, ták-kang chah lâi hák-hāu ê piān-tong lâi-bīn lóng òe ngheh-tiòh thâu-m̄ng.” Tāi-ke tī pōe-āu lóng teh phì-siùⁿ chit-ūi tông-hák. Iáh in-ūi piān-tong lâi-bīn ê thâu-m̄ng, tāi-ke lóng tui i chin bô hó ìn-sióng.

Ū-chit-kang pàng-òh liáu-āu, hit-ūi tông-hák chio góa khi in-tau thit-thô, sui-bóng sim-lāi put-chí ngāi-giòh, tñn-sī i chin sêng-ì koh thâu-chit-pái iau-chhiáⁿ góa, góa iáh pháiⁿ-sè the-sī. In tau tòa-tī chit-ê chin sàh-hiong ê chng-thâu. “A-bú, góa chhōa

pêng-iú lâi chhù--nih thit-thô”, lâu-bú thiaⁿ-kìⁿ hāu-siⁿ tng--lâi, kóaⁿ-kín tui pâng-keng kiáⁿ--chhut--lâi, “Góa hāu-siⁿ ê pêng-iú lâi lah, góa khòaⁿ-māi-leh.” Tñn-sī góa sòa hoat-kak chit-ūi ma-ma keng-jiân sī iông bong-ê kiáⁿ--chhut--lâi, gōan-lâi i sī chit-ê chhiⁿ-mī ê lêng. Hit-tiáp góa kui-ê nā-āu-khang lóng tñn--khí--lâi, òe lóng kóng bōe chhut--lâi.

Sui-bóng ták-kang lóng sī chiáh tâu-pô phòe png, khiok-sī bák-chiu khòaⁿ-bōe-tiòh ê lâu-bú chin sè-jī pang i pī-pān ê piān-tong, he m̄-nā sī chit-ê piān-tong nā-tiāⁿ, té tī piān-tong lâi-bīn..ê, iáu-kú ū lâu-bú tui kiáⁿ-jī móa-móa ê thiàⁿ-thàng, sīm-chì chham-cháp tī piān-tong lâi-bīn ê thâu-m̄ng koh-khah sī chit-ê lâu-bú ūi kiáⁿ hi-seng hòng-hiàn, bô kiú hōe-pò, bú-ài ê kì-hō.